



Kamwe Sheria ya Mungu

Haibadiliki

Hapo Bwana alipokuwa amekwisha zungumza na Musa katika mlima wa Sinai, akampa hizo mbao mbili za ushuhuda, mbao mbili za mawe, zilizoandikwa kwa chanda cha Mungu.—**Kutoka 31:18.**

Wakati wa kipindi maalum cha mfumo wa dini ya Kikristo, adui mkubwa wa furaha ya mwanadamu ameifanya Sabato ya amri ya nne kuwa lengo la shambulio maalum. Shetani anasema, "Nitafanya kazi kwa kupingana na makusudi ya Mungu. Nitawawezesha wafuasi wangu kuweka kando kumbukizi ya Mungu, Sabato ya siku ya saba. Hivyo nitauonesha ulimwengu kwamba siku iliyotakaswa na kubarikiwa na Mungu imebadilishwa. Siku hiyo haitadumu kuishi katika akili za watu. Nitafuta kumbukumbu yake. Nitaweka badala yake siku ambayo haina sifa za Mungu, siku ambayo haiwezi kuwa ishara kati ya Mungu na watu Wake. Nitawaongoza wale wanaoikubali siku hii kuweka juu yake utakatifu ambao Mungu aliuweka juu ya siku ya saba.

Kupitia katika kuanzishwa kwa sabato ya uongo, adui aliazimu kubadilisha nyakati na sheria. Lakini je amefanikiwa kweli kubadilisha sheria ya Mungu? Maneno ya sura ya thelathini na moja ya Kutoka ndiyo jibu. Yeye aliye yule yule jana, leo, na hata milele, ametamka juu ya Sabato ya siku ya saba: "Ishara kati ya mimi na ninyi katika yizazi vyenu vyote." "Ni ishara ... milele" (Kutoka 31:13, 17). Alama ya barabarani iliyobadilishwa inaelekeza katika njia isiyo sahihi, lakini Mungu hajabadilika. Yeye bado ni Mungu Mwenyezi wa Israeli. "Tazama, mataifa ni kama tone la maji katika ndoo, huhesabiwa kuwa kama mavumbi membamba katika mizani; tazama, yeye huvinyanyua visiwa kama ni kitu kidogo sana. Lebanoni nao hautoshi kwa kuni, wala wanyama wake hawatoshi kwa kafara. Mataifa yote huwa kama si kitu mbele zake; huhesabiwa kwake kuwa duni ya si kitu, na ubatili" (Isaya 40:15). Naye ana wivu kwa sheria Yake sasa kama vile alivyokuwa nayo katika siku za Ahabu na Eliya.

Lakini sheria hiyo imepuuzwa kiasi gani! Tazama ulimwengu leo katika uasi wa wazi dhidi ya Mungu. Kwa kweli hiki ni kizazi kipotovu, kilichojawa na utovu wa shukrani, urasimu, unafiki, kiburi na uasi. Watu huipuuza Biblia na kuuchukia ukweli. Yesu anaona sheria Yake ikikataliwa, upendo Wake ukidharauliwa, mabalozi Wake wakitendewa kwa kutokujali. Amezungumza kwa rehema zake, lakini hizi hazikutambuliwa; Amesema kwa maonyo, lakini haya yamedharauliwa. Nyuà za hekalu la roho ya mwanadamu zimegeuzwa kuwa mahali pa biashara isiyo takatifu. Ubinafsi, hasuda, kiburi, uovu — vyote vinahifadhiwa kwa upendo mkubwa.

Wale ambao wanaliamini neno hilo kama linavyosomeka hasa wanadhihakiwa. Kuna dharau inayozidi kuongezeka juu ya sheria na utaratibu, ambayo inaweza kufuatiwa moja kwa moja na kufikia ukiukaji wa amri za wazi za Yehova (Manabii na Wafalme. Toleo jipya, Uuk. 155 – 157).

Yehova aliziandika amri Zake kumi kwenye mbao za mawe, ili wakazi wote wa dunia wapate kuielewa tabia Yake ya milele isiyobadilika (Counsels to Parents, Teachers, and Students, 248).